

Date – 22/03/2025

Time - 18:30 -18:40Hrs

REGIONAL NEWS BULLETIN

HEADLINES (EVENING)

- Mizoramah thla 3 dawn vawk pul hri African Swine Fever a reh hnuah Mamit leh Lawngtlai Dist ah te a leng tih finfiah a ni leh tawh.
- Siaha District hmasawnna hnathawhna turin Central sorkar chuan cheng nuai 6000 a pawmsak.
- Supreme Court Judge-te aiawh member panga awmna delegation team te chuan vawiin khan Manipur an tlawh.
- Vawiin World Water Day-ah Prime Minister Narendra Modia chuan tuihna humhalh turin sawrkarin theihtawp a chhuah dawn tih a sawi.

<><><>

ASF

Mizoramah thla 3 dawn vawk pul hri African Swine Fever a reh hnuah Mamit leh Lawngtlai Dist ah te a leng tih finfiah a ni leh tawh a.

AH & Vety Dept atanga thudawn danin, heng dist a vawk thi te sample hi Aizawla test anih hnuah a nemngheh nan Guwahati-a a endikna hmunpuiah thawn a ni a, result ah ASF a ni tih finfiah a ni ta a ni.

Tuna record thar berah chuan Mamit Dist Zawlnuam Bawrai vengah vawk 16 a thi a, Zawlnuam Vengpui -1 a thi a ni.

Lawngtlai ah hian vawk 72 a thi a, Bungtlangah 188 a thi a ni.

Kuminah African Swine Fever (ASF) vawk pulhri a puan thawm hriat vawi khatna a ni a, ASF vawk pulhri leng ni nikum tawp lam thlasik intan atang khan a zia chhova, December thla tawp lamah phei kha chuan ni khata vawk thi leh vawk suat awm loh ni a awm chho zel a. Vety department hotute chuan khua a lum chhoh a ruahtui tlem a tlak chuan vawk pulhri puang hi awm chho leh nghal mai a ni an ti.

Mizoram hi ASF vawk pulhri hian kum 2021 bul lam atang khan a chen chilh tawh a, kum tin a puang ta ziah a. Kum 2021 March ni 21 a Lunglei district a Lungsens khua a ASF vawk pulhri a leng tih hmuhchhuah a nih atanga nikum kum tawp lam thleng khan Mizoramah vawk nuai 1, sing 1, sang 1 leh 434 thi leh suat a awm tawh a. Vawk thi zawng zawng hi 62,761 a ni a, vawk 49,267 suat a ni tawh bawk.

<><><>

Young Indians North East Regional Council Meeting chu vawiin khan Aijal Club ah neih a ni a, Labour, Employment, Skill Development & Entrepreneurship Minister Pu Lalnghinglova Hmar in a hmanpui.

Confederation of Indian Industry (CII) hnuaia thalaite huikhawmtu peng Young Indians North East Regional Council Meeting ah hian Hmarchhak state hrang hrang a Young Indians Chapter hruaitu engemaw zat an tel a ni.

Pu Lalnghinglova Hmar chuan Young Indians chu thalai te huikhawmtu, pawl tangkai leh kawng hrang hranga a bik takin sumdawnna leh entrepreneurship lamah thalaite kawng kawhhamtu a nih thu a sawi a. Young Indians te thil tum leh hmalakna chu Mizoram Sawrkarin in thalai te tana hna a thawh tum dan nen a inmil hle thu sawiin Hmarchhak state hrang hrang atanga thalai hruaitu kalkhawmte chu an khawtlang leh an state theuh hmasawnna atan ke pe zel a, hmahruaitu ni turin a chah a ni. Young Indians hmalakna pawimawh tak pakhat chu ram chhung thalai te tan inhriattawnna leh inpawhtawnna networking opportunities rem siamsak a nih thu a sawi tel bawk a ni.

North East Regional Council Meeting hi Young Indians Chapter Chair – Mizoram Pu Robert Rohmingliana’n kaihruaiin Young Indians Regional Chair – Northeast Pi Christine L Sailo leh National Vice Chairman Young Indians Pu Arun Rathod te pawhin thu an sawi a. Thupui hrang hrang 14 a Regional Mentors te thusawi ngaihthlak a ni a. Guwahati, Nagaland leh Mizoram Chapter atangtein hmalakna tha a neihte Best Practices sawihona hun te pawh hman a ni bawk a ni.

Young Indians hi India rama industry lama hmalatu pawl lian ber zinga ngaih CII hmalakna niin thalai te a bikin an thlur a. India state hrang hrang ah Young Indians hian Chapter 70 chuang an nei mek a, Member mi 7000 chuang an awm mek bawk a ni.

<><><>

TREASURY BAZAR

Aizawl Municipal Corporation (AMC) thupek angin Treasury Bazar Association te chu vawiin atang khan AMC Multi Complex, Tuikual South ah an thu tan.

Treasury Bazar Association Secretary Pu C. Lalrinawma chuan thutna thar tura ruahman AMC Multi Complex, Tuikual South - ah vawiin atanga an thut tan thu a sawi a. A huho a luhthlak mai ala remloh avangin vawiin bikah chuan sa zuar leh chawhmeh zuar mi 30 bawr vel an thu a, karleh lamah a tam zawk thu lut tura an inbeisei thu a sawi.

Hetih lai hian, Treasury Bazar-a an thut lai leh bazar thar luh ni a an hralh chhuah chu a inthlauh hle thu a sawi.

Pu C. Lalrinawma chuan hotuten an tiam ang ngeia kawngpui dunga la inpho te pawh ti tawpa hmalak an beisei thu a sawi bawk.

<><><>

Siaha District hmasawnna hnathawhna turin Central sorkar chuan cheng nuai 6000 a pawmsak.

Mara Autonomous Dist Council CEM Pu M. Laikaw leh hruaitu dangten central sorkar hi dawrin, hmasawnna hnathawhna tur project hrang hrang an thehluh zinga pawm te chu cheng nuai 3000 senga Maraland Centenary Hospital sak tur te, cheng nuai 900 senga Multipurpose Youth Centre sak tur te, Aizawl Zotlanga Mara Tribal Girls Hostel sakna tur cheng nuai 900 te, MADC-a school building hrang hrang sakna tur cheng nuai 1000, MADC –a thei leh thlai vawnthatna leh reitur sawngbawlina dinna tur cheng vbc 3 chuang leh Tipa Multipurpose Hall sakna tur cheng nuai 400 te a ni.

Central sawrkar chuan Siaha hruaitute'n an thlen angin tuna project an Approved bak a Project dangah pawh hmalak chhunzawm zel a nih tur thu Siaha District hruaitute an lo hrih bawk niin hemi chungchanga BJP Mizoram thuchhuah chuan a tarlang a, Politics an khelch chhan ber Development thlenna tur atan BJP a pawimawh a ni tih hei hian a ti lang Chiang Hle ah an ngai tih an thuchhuahah chuan an tarlang a ni.

<><><>

LAWNGTLAI FREE CLINIC

Lawngtlai District Hospital Lawngtlai-ah, a mamawhtu apiangte tan a thlawna inentirna 'Multi-Speciality Clinic' nimin khan buatsaih a ni a, mi 2600 chuang hriselna endik a ni.

Inentirna hun hi Indian Medical Association (IMA) Mizoram Branch, Mizoram Gov't Doctor Association (MGDA), Indian Dental Association (IDA), leh ZMC Faculty Doctors Association (ZFDA) buatsaih a ni a, damdawi a thlawna sem a ni.

Lawngtlai District-a damlo leh natna tuar mek mi harsa zawkte'n, awlsam zawk leh a thlawna mithiamte an inentir theih nan hian, Lawngtlai East MLA Dr. Lorrain Lalpekliana Chinzah, Adviser to Chief Minister chuan Doctor Association-te hnenah ngenna a siam a. MLA ngenna ang leh, IMA (Mizoram Branch) te'n an lo tih fo thin tawh angin he Multi-Speciality Clinic hi kalpui a ni a. Doctor Association-te hnenah hian a mamawhtu apiangte'n an hman atan, Lawngtlai East MLA chuan cheng Nuai hnih a hlan a, Lawngtlai west MLA Pu C.Ngunlianchungan cheng sing 5 damdawi man atan a hlan bawk a ni.

<><><>

INDIGENEOUS GAMES

Broadcasting Infrastructure & Network Development (BIND) leh Mizoram Indigenous Games Association tangkawp buatsaih 'DD Mizoram Indigenous Games 2024-25 chu zawhfel a ni a, Aizawl district chu District Champion a ni a, medal 16 an la a, pahnihna chu Saitual district niin pathumna chu Kolasib district an ni.

Nizana a kharna inkhawm chu Aizawl Chaltlang Field-ah Sports & Youth Services Minister Pu Lalnghinglova Hmar chuan a hmanpui a, he hunah hian thusawiin Minister chuan he hmalakna avang hian mizo thangthar tam takin mizo infiamna an hmelhriat pahin an ngaih hlut phah ngei a beisei thu a sawi a ni.

'DD Mizoram Indigenous Games hi February ni 20 khan Serchhipah inelna hi kalpui tan niin District tinah buatsaih a ni a. Inelna neih chhung hian YMA branch 131 atangin infiammi 2290 an tel a ni. Indigenous games ah hian mipa tan

insaihrupawh, insuknawr, inarpathai leh inbuan te awmin hmeichhe tan inkawibah a tel bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar hi puan leh a ni ang.

<><><>

SC IN MANIPUR

Justice B R Gavai-a kaihhruai Supreme Court Judge-te aiawh member panga awmna delegation team te chuan vawiin khan Manipur an tlawh. Justice Gavai hi National Legal Services Authority (NALSA) Executive Chairman ni lai niin tukin khan Imphal khawpui an thleng a. Imphal an thlen hian judge pathum Justice Gavai, Justice Vikram Nath leh Justice M M Sundresh te chuan Churachandpur an pan nghal a. Legal services camp, health camp, legal aid clinic-te an hmanpui a ni.

Hei bakah hian state chhung buaina avanga ralhlante hnenah chhawmdawlina bungrua an sem nghal bawk a ni. An haw lamah Bishnupur district-a chhawmdawlina camp an tlawh bawk a.IDPs te harsatna tawh hrang hrangte an ngaithla a. Naktuk hian Manipur High Court in Imphal-a inkhawm an buatsaihah an tel leh ang.

<><><>

WATER DAY

Vawiin khan World Water Day-ah Prime Minister Narendra Modia chuan tuihna humhalh leh hmasawmna tluantling nei turin sawrkarin theihtawp a chhuah dawn tih a sawi. Social Media-a a thu dahah Pu Modia chuan tui hna humhalh pawimawh zia tarlangin mihring nunna tura pawimawh chu tui anih thu sawiin nakin zela chhuan lo awm zel tur tan tui hna humhalh hi a pawimawh hle a ni a ti.

Vawiin Water Day ah hian ramchhung hmun hrang hrang tui hna humhalh leh tui renchem pawimawh zia inzirtir nan hman a ni a. Khawvel pumah tui avanga harsatna thleng mek ti ziaawm tura tan lak a tul zia inhrilhthar an hman a ni.

<><><>